

## **Timuteyutshi mozhua ne kalta zuñgajienapanaldiamak**

**Meja ai kalta gauwane:** Pábulduki Duwe Jesúja ají múldigaba guaxal gaxaneja jalde kaltaki gauwane. Aldéñki naki shuixal noxaldixa aldiwe kalseldi izhoguéñ jalde kalta Timuteyu agakauwane. Akldé Pábuldu shaldaga miñkualdaldiamake “Aldumaxa zaldakuetsi kalta zuñgajienapanaldiamak” gaune tuakue.

**¿Metshi kalta gauwane?** Pábulduja asukuá jana ne Timuteyu jalde kalta agakauwane. Akldé Timuteyu shaldaga miñkualdaldiamake “Timuteyutshi kasak ne kalta zuñgajienapanaldiamak” gaune tuakue.

**Jinak ai kalta gauwane:** Atshak Pábulduja naki shuixal noxaldixa akué nane (1.16-17; 2.9; 4.13). Akna Timuteyu sakí muldetua Duwetshi jiba ulditshixalga nogakue aldiwe guiyaba akbeji kalta agakauwane. Ekibeñga na, Timuteyu namak shitiyanamakga abá naldakí namak jañgui, shaxaldiyakue akbeyaldiamak. Ekíga na, Pábulduja sakí Duwe axazauwi izhogamakbe agastuwi amak izhogakue akbeyaldiamak. Atshak Pábuldu matshuwi jibañ tuwi, itshaniñgaba guatoguéñ, Duwe ipananekue sakí alduká akualdana akzeshi na, jalde kalta Timuteyuk agakauwane.

**Ji, ji shalda guashi jalde kalta gaune:**

1. Kasak misha ji shalda akbene (1.1-2)

2. Muldetua Duwe Jesúk agapa neyakue (1.3-14)
3. Pábulduja sakí nuka akbene (1.15-18)
4. Duwe Jesú axazauwakuamak axazauwakue akbene (2.1-26)
5. Auxa zegapanatshak sha ashekualdapanaldixa (3.1-9)
6. Timuteyu guiyaba akbene (3.10-4.8)
7. Sakí atshakue aldiwe akbene (4.9-18)
8. Aldiwe akbene (4.19-22)

## **Pábulduja Timuteyuk mozhua ne kalta akuzgaune**

<sup>1</sup> Naski Pábuldu Saldiñga netshi Jateja jañguamak Asukuá Duwe Jesú Zunekualkajañki ají múldigaba guaxal nakaxanek kalta gauwatokuge. Jateki Asukuá Duwe ipañañkaldekuañ izhoshiñga zunezhokshaldixa zũñmeyanane nak, ai shalda guaxaldikuamak nezhgakuxane nzhakú. <sup>2</sup> Timuteyu, mañki nasukuá giemi<sup>☆</sup> jana majañguge jalde kalta mikuzgauwatokuge.

Saldiñga netshi Jate Nauwijatega, Asukuá nauwijí Sáñkalda Duwe Jesú na, atemajañ éegaba guañ majañgui na, zeñ majañgualga, muldetua aldunaxa señgaba mikzukui shi mezhokshí.

### *Muldetua Duwek agapa neyakue*

<sup>3</sup> Guatshak nabamakueja Jate axazauñka nanamakbeñga, nas jiaga “atshakuamak

---

<sup>☆</sup> **1:2** 1.2 1Tm 1.2

sha atshatokú” nakldeshi axazauñkuge. Niuwisuñ, sesuñ axazguakugauxa ma shalda be mezhgisekui, “zeñ nzhakldék” akbeñkuge. <sup>4</sup> Nas mabashapanaldatshak mauwamalde be nagisegatshakna, matshuwi zeñ nakzexaldiamak mokue matundana nakzeshi ni izhokú. <sup>5</sup> Ma Duwe Jesúk migatsauxa alduna mishixa jiaga be mezhgisekualga nokuge. Akze, mijaba wezhu Aldueda, mijaba Eyunise mizhaxaña Duwe Jesú namak ajañgui, alduna iyashixa nanamak, ma jiaga ekíga Duwe namak jañgui, agapa neyabalduka muldetua maldakué.✧ <sup>6</sup> Ekí nakuakna ekí be migisekualdikue. Káuxalda mipañgualdatshak Jateja axautshikue magaunexaldiamak matshishaldixa migeneke guksé sanazháldiamak ajueñguamak akldañga amak axatshál maldoxaldí. <sup>7</sup> Akze, Jateja zhe zalda xalde naldakualdiamak ají Alduna zuñgegazháne. Ekí ne, aldunaxa kama naldakualdiamak zunake ají Alduna zuñgene. Eñkaña na, axautshikue izhgajañguakualdiamak zuñgauneka. Eñkaña na, axaldáñ muldetua zhiksanegakualdiamak zuñgauneka nakldá.

<sup>8</sup> Akna nauwiji Sáñkalda Duwe mikuane shalda guagakue jiwak mikzegagába, ni nas e shalda kalseldi nabexane shalda jiaga jiwak mikzegazháldi. Ekí ne, Jatejañki ají kama migeneñ zhinik na, Duwe shalda guaxabaldogéñ najanamé e shaldaki guiyaba tumildaka mitshanaldí. <sup>9</sup> Akze, Nauwijatega zunekualdi ají giemikue, aldéñ akldunamak

---

✧ 1:5 1.5 Ajsh 16.1

izhogakualdiamak zunezhgakuxá guane. Naldatshak nasuñ janshizhe katshéñ zhinik zunezhgakugagába,✧ kasaxaga zhinik éegaba guañ zunajañgui Asukuá Duwe Jesúk zunekualdaldixa janazunñgaktunanéñ zhinik na ekí zunezhgakuxane. <sup>10</sup> Ne kaigaki Asukuá Duwe Jesú zunekualdal kagik nagatshakna, Jate mitsá éegaba guañ zunajañguxa mu zunñgisekuá. Akze, Duwejañki shuixak kama ikugatshakna agubiyá guane.✧ Akna Duwe znekuane nukshi kipanéñ zhinik na, izhoshiñga zunezhokshataná mu zunñgisekuá guane nakldá.

<sup>11</sup> Akze, Duwe Jesúja aldéñ znekuane shalda guaxaldikuamak, ají múldigaba guaxal nakaxane naldaldikuamak, e shalda shizhiyaldikuamak nezhgakuxane.✧ <sup>12</sup> Amak axatshikuge shalda na kalseldi, guiyaba tuwi izhoxaldatshak jiaga, jiwak nakzegáaki ni izhokú.✧ Jina nak naldakí. Naski Duwe Jesú namak jañgui alduna ishikugeki muldetua “me ne” nakué. Ekí nakualdi na, “Duweki kaiga zhinik mokue naxaldieñka yo, nají alduna auxaga agenuge numañ nagatuaka, jiba axatshaldikue nagene numañ nagatuñka shakldá” nakué nak.

<sup>13</sup> Guatshak nas jian shi mixaldiyanuge nagastú xaldeki ma zhinik ekíga shizhiji makualdí. Amak shizhiyabaldogatshak, Duwe Jesútshi nekbaldéñ zhinik na, ek za alduna ishalga, axautshikue kezhgajañgualga mizhoxaldí. <sup>14</sup> Jateja múldigaba Asukuá

---

✧ **1:9** 1.9 Ep 2.8-9; Tit 3.5 ✧ **1:10** 1.10 1Kt 15.54-57 ✧ **1:11** 1.11 1Tm 2.7 ✧ **1:12** 1.12 Alm 1.16-17

zunekuane namaklde makuaxaldiamak mezhgakuxane nakna, ají Alduna nasuñldi izhuka migaunegatshakna, ai jian shizhiya akzeki ayushazháldiamak numañ tuwi makualdí.

<sup>15</sup> Guatshak mikuamakga na, Asia zalda Duwe ipanane matshuwi nekueki nabashá akuane, aikuega na Pijeldu, Edmójene nakldá.

<sup>16</sup> Onésipulduki ajúk zaldakue juizhi nauwiji Sáñkaldaja guañ jañguakue akshishikuge. Jina nak naldakí. Kalseldi nabexane shalda jiwak akzegagába, naxabizhi matshuwi juizha zeñ nakzukui aldunaxa nezhiksekushane. <sup>17</sup> Ekí atshaldiamake, jai kuíbuldu Aldumak nagatshak, mani nabexane akzaldaldikuamak kama ilshiji naldijiñgaba akzanuge. <sup>18</sup> Axaña Epesuxa izhogukuéñ jiaga, eñki nagauneshiñgaba izhonane muldetua mikué. Akna, nauwiji Sáñkalda Duwe Jesú zuñgatsé azhi zuñgatsaldakí ne zunatualdiéñ ldiuwañ, eñki guañ shi jañguí.

## 2

### *Duwe axazauwakuamak axazauwakue*

<sup>1</sup> Nasukuá ma, Duwe Jesú éegaba guañ majañguéñ zhinik na aldunaxa kama guxamalde mizhoxaldí. <sup>2</sup> Guatshak matshuwi nekueja nukatoguéñ Duwe shalda shizhiyaté naldukamaldamakga, ma zhinik mieldekueki axautshikue amak shaxaldiyaka alduna ishamildakakuek na shaxaldiji makualdí.

3 Guatshak suldáu janshizhe\* guiyaba tuakue agatsegatshak abetamakbeñga, mañki Duwe Jesú axazauwabaldoxaldiéñ guiyaba tuakue migatsexaldiák, nauwijanamé abeti makualdí. 4 Akze, suldáu ají sáñkaldak akldunamak axatshindana akzegatshakna, eja jiba agene axatshál izhoxaldiéñ, ni mitsák ají jiba naldagálde atshaka jañguazhé nak ekibé naldakue. 5 Ekibeñga na, ezua naldi jokldeka jana naldakue. Nalkakue mielde axañga neyaldieñka neyaldiake, ubixa awatualdiamak sáñkaldak izhalshuxa agaxeka. Ne, sakí naldakue auxabé naldakí naldaldiák, ai ipanazháldixa nakldá.✧ 6 Ekíga na, tezhi jiba atshixa jana naldakue.† Mieldeki muldetua gakue munaldiamak kama ilshiji jibatshanaldixa gakue axaldegatshak, aldéñ misha izhgakugakuamak izhgakuka naldashá. 7 Sakí mikbeyatokuge muldetua agajañgui makualdí. Ekí magajañgualdiake nauwiji Sáñkaldajañga muldetua migajieñgualdixa nzha.

8 Duwe Jesú shalda ekí be mizhgisekualdí: Aldéñki nauwibama Dabítshi atukua nane.

\* 2:3 2.3 2Tm 1.8,12; 3.12. Nasuñ Duwe ipanañkaldekuañki Duwe Jesútshi suldáu jana kaldé. Akna, ek iyabá naldakí neyañkaldogéñ guiyaba katuatshak jiaga, agapa neji, ek za axazauwi izhoxañkaldogéñ aldéñ aguldiñka jisé ají aldunakue na kaxaukshixa. ✧ 2:5 2.5 1Tm 4.7-8; 1Kt 9.24-27 † 2:6 2.3-6 Suldáu azhi ezua naldi jokldeka azhi tezhi jiba atshixa jana naldakue zuñmeyatshake ekí guashi naldaka. Nasuñ Duweja janshizhe zuñkatshaldixa zuñmene ipanakualdiamake, aldéñ sakí axazauwakue, izhogakue nake, auxabé kama ilshijiñga axatshakue zuñgatsé.

Ega na nauwitsaldí shuiguenui Jateja mokie izhgaldakshá guane. Akna Duwe z̄nekuane shalda guaxaldatshak ekí za guaxal izhokuge. <sup>9</sup> Ekí guakugé shalda na, sha atshixa jana guiyaba tuwi kalseldi shezhasha nezhuka ni izhokú. Ekí neji guanakldegak izhoxaldatshak jiaga, Jatetshi múldigaba z̄nake ni jiyája itamakua naldakí, neyalga nzhok. <sup>10</sup> Akna Jateja káguba ikualdaldixa kezhgakuxanekueki agaunexaldikuamak sakígaba jibañ tuakue nagatsaldaldiák jiaga abeti, “wa” nuxa itshanaldikue. Ekíki Duwe z̄nekuane namak jañgui iyapani zhinik na amak keyakuanekue, Jateja aldéñ na muñshí zeñka izhoshiñga kezhoekshaldiamak.

<sup>11</sup> Jalde múldigabaki alduna ishaminaka:

Duwe Jesú shuigatshaga, nasuñ jiaga e nañga shuañkalde zhuxañga kaldake,‡  
ake, e nañga be izhogakualdixa.

<sup>12</sup> Nasuñ Duwe shaldá guiyaba tuwi abetakualdiák,  
ake, aldéñ na saneshi izhogakualdixa nzha.✧

Ekí ne, “Duwe Jesú ipanazhánuge nzha” guakualdiák,  
ake, aldéñ zhinik “nají naldagáldekue nzha” z̄nakuaxaldixa nakldá.✧

<sup>13</sup> Nasuñ Duweja z̄ñmeyamak axatshál nogakí naldakualdiák jiaga,

---

‡ **2:11** 2.11 Alm 6.6-8; Ga 2.20. Ekí z̄ñmeyatshake ekí guashi naldaka. Shuane sha atshindana akzekaja aksanegaksánamakbe, z̄ñsanegazháka itshanakue z̄ñgatsé. ✧ **2:12** 2.12 Alm 8.17 ✧ **2:12** 2.12 Mt 10.32-33; Lk 12.9

aldéñki sakí zuñkatshaldixa  
 zuñmeyanamak zuñkatshixaga nakldá. ✧  
 Jinake naldakí. Aldéñki me ne ayushá  
 atshazháka nak.

*Jatek akldunamak za axazauwakue*

<sup>14</sup> Guatshak ekí mikbeyatokugeki Duwe ipananekuek be kagisekualga noshi na, Jateja tuatogéñ ishkaldukaldiamak ekí kabakbeyaldí: “Múldigababata zhiksashiji izhogasúñze.” ✧ Mieldeki ekí izhoxaldiake, ni mek axazauwazháldi na, aldukatukakue aldunaxa kagisalshi za atshaldixa nzha.

<sup>15</sup> Ne ma zúnake Jateja ají jiba janshibé axatshamalde matualdiamak kama ilshiji makualdí. Ekíki ají múldigaba namaklde shizhiyakuauxabe shizhiji mizhoxaldiák, ni ji shalda jiwak mikzegakue migat-saldazháldiamak.

<sup>16</sup> Ekí ne, ezuakueki múldigaba agatsegazháka Jatek zhinik nagazháne za duldashál ashekualdatshakna, akldé akldéñga Jatek akldunazhámak ashekualdapanaldixa nakna, ma zúnake ekí duldashagábaki, aik agajué maldoxaldí.

<sup>17</sup> Akze, ekí agatsaldi duldashiji, naldagálde shizhaldiyatshakna, nuwa migaldagatshak saldiñga abuá migaldagakuamak, aikueki Jatek axapa aldeyaksánatshak zhinik axautshikue jiaga iyajuldukshixa. Ekí shizhixakuega na Imeneyu na Pildetu na <sup>18</sup> namaklde shizhiyak iyajuldunatshak zhinik, ekí naldagálde za shizhaldixa: “Jateki abisajañ

✧ **2:13** 2.13 Alm 3.3-4; 1Kt 1.9 ✧ **2:14** 2.14 1Tm 6.3-4,20



zunakukshatshakna au zunezhgaldakshá guane nak, abuáke zunezhgaldakshazhaldixa nakldá.” Ekí shizhaldiyéñ zhinik na, ezuakueki Duwek alduna iyashaksánsha akuane nakldá.

<sup>19</sup> Naldatshak, Jatetshi nekldekueki ají múldigaba namaklde ajañgualga za aldoshi, eñkáñ kama akuxanéñ zhinik na ekí kakzuñguane: “Saldiña netshi Sáñkaldaja ají nekldekueki akualdi nogatukakue.”<sup>✧</sup> Ekíga na, “ ‘Duwe Jesúki nají Sáñkalda nakldá’ saldiña guakakuejañki sha ajanashixa nuk abajakue kagatsaldashá.”

<sup>20</sup> Guatshak juwí atemaldiñki jika matshuwi kue. Ezuakueki niuba akzekue axauwane nanaldixaki, ajáugukuija jiba akldé akzék za jiba akbeñka. Ne ezuakueki tiuwi azhi kaldi axauwane nanaldixaki, ajáugukuija jiba aguáñ akzék nuxa jiba akbeñka naldashá. <sup>21</sup> Ekibeña na, mieldeki janshi ishkazguí sha atsha nuk majaldiakna, nauwijí Sáñkaldaja niuba axauwane jana jiba akldé akzé agegaka naldaldixa. Akze, eñki Jatetshi za naldaldixa, nauwijí Sáñkalda muldetua axazauñka, saldiña janshizhe nalda axatshaldiamak janazhiktune naldaldixa nakldá.

<sup>22</sup> Akna, mañki awawakue sha ajanashindana kakzegamakga atshabaldáldiamak sha atshindana mikzexak izhakuishi makualdí. Ekí izhakuishi na, migatsauxa ekí izhoxa maldiyaldí: Jian atshakuamak za izhoxa, Jatek za alduna isha, zujañgua izhoxa, axautshikue na muldetua señgaba zhe noxa za maldiyaldí. Akze, saldiña aldunaxa janshi ishkazguane nauwijí Sáñkalda

✧ **2:19** 2.19 Nm 16.5; Jñ 10.14; 1Kt 8.3

akldé akzamakga akzukuxakue juizhi ekí izhoxa niyal maldoxaldí.

<sup>23</sup> Ne, ezuakueki alduna kaxaldegagálde jana, múldigababata akzaldagálde izhgasashapanaldinik asuxake axaukshaka mikuakna kagaunegagába, múldigaba zhiksashak agajué za mizhoxaldí. <sup>24</sup> Akze, nauwiji Sáñkaldak kaxazauñkakuañki múldigaba sashiji izhogasúñze zúñgatsé. Ekí naldagábaki, juañ zaldaba za axautshikuek kaxatshakue, Jatetshi múldigaba muldetua shizhiyanazúnaka naldakue, sakigaba zúñkajanashatshak, egaba abeti izhogakue zúñgatsé. <sup>25</sup> Akze, mielde aguldiji kizhukakue sam akzaldi Jatetshi múldigaba namaklde shi kaxaldiyakue. Jinake ekí atshakue naldakí. Saigabaki ekueja namaklde aldukatshak, Jateja kagauneshiñga sha atsha abashiji Jate axakualdi guaka nak. <sup>26</sup> Ekíki uba kakldeji guxá jana jiséja saigaba kejudukshaldiamak janaktunéñ kejudukshane iyaldakuixaldiamak. Akze, jiséja ají nashi kakuí, aldéñ kajañguamak axajanashaldiamak naldagálde nuxa jian kakzukuane nakldá.

### 3

#### *Auxa zegapanatshak sha ashekualdaldixa*

<sup>1</sup> Mikualdaldiamak ekí mikbeyaldikue: Auxa zegapanatshak, zuxaita jibañ tuakue ldiuwañ zexaldixa. <sup>2</sup> Atshakna káguba axaldáñ za ajañguxakue, paldata za ijankakue, sekuazhikshixakue, axaldáñ shalda janshagatse za akuakakue, saldiñga aguañ

izhbashiji mual nekakue, kauwijatekue amak axatshazhékue, mielde kagaunegatshak “zeñ nzhakldék” negagáldekue, Jate axabetagáldekue, <sup>3</sup> ni me izhgajañguagáldekue ashekualdaldixa. Ekíga na, sha kakuane ni nauwa axabetagáldekue, káguba nalda aguakakue, axaldáñ zhiksanegagáldekue, axautshikue sha gui mual za atshixakue, janshizhe atshakueki kaguldiñkakue naldaldixa. <sup>4</sup> Ekí aldaldi na, kauwipbukue jiaga izhguak atshixakue, jañguagáñga za atshixakue, kauwizhéñ za akzé itshankakue. Ekíga na, Saldiñga netshi Jate izhgajañguagába, kauwizhéñ kakldunamak izhoxa za akzé ajañgualdixa. <sup>5</sup> Ekí aldaldi na, Saldiñga netshi Jate akzé ajañguxakue ga abeldashi izhogatshak jiaga, jian izhogakualdiamak ají kama zuñgekaki ni nauwa ipanasúñ kakzekakue. Akna aikuek ni nauwa kaxabaldegagábaki, muldetua kagajúé maldoxaldí.

<sup>6</sup> Akze, ekí izhukakueki munzhi aldunaxa kama aksúñzekue tshuxa kagakjuldunaldinik, kauwizhéñ za kaxazukaldiamak iyajuldukshi mual naldagálde jian kakzukuxa. Guatshak ai munzhikueki saldiñga nalda sha ajanashindana kakzekája kaksanegamak matshuwi sha ajanashane shalda aldunaxa jie kakzekakue. <sup>7</sup> Ekueki ji naldaldí shitiyal aldogatshak jiaga, mielde namaklde ne kakldegazhákakue. <sup>8</sup> Akze, mauzeñga mozhua nekue, Jane, Jámbalde na, nauwibama Muesé kaguldiyanamakbe,✧ ai naldagálde shizhixakue namaklde shizhiya

---

✧ 3:8 3.8 Ex 7.11-12,22

kaguldiñkakue. Ekueki nusagatse za jañgui, Jate shalda namak jañguazhékue ni alduna ishagáldekue nakna, Jate namak jañgua kakzegazhákakue. <sup>9</sup> Naldatshak kauwizhéñ anuñkamé za ekí shizhiji, naldagálde nuxa namak ne kágubakue kajañgushaldixa. Jinake naldakí. Mitsá zegagá noxaldieña, kauwizhéñki alduna kaxaldegagálde jana nuxa shizhaldixakue saldiñgak mu akiyasexaldixa nak. Ekíga na Jane, Jámbalde na zekldane naldashá.

*Timuteyuk guiyaba akbene*

<sup>10</sup> Guatshak ma zúnake namaklde za shizhikuge muldetua mikualdi na, jian atshál izhokuge, Jatek za alduna ishiji izhokuge nagastuwi na, “Jatek za axazauwaldikuamak izhoxaldikue shakldá” za itshani izhokuge mikualkuge. Naski axautshikue izhgajañgui izhokuge, sakígaba naxajanashatshak abeti izhokugé, jibañ tualdatshak abá naldakí abeti izhokugé mikualkuge. <sup>11</sup> Ekíga na, sakí Duwe shalda sha nakuí guiyaba natuñshiñgaba nakuane jiaga mikué. Akze, kuíbuldu Antiukiaxa, Ikoniuxa, Aldístaldaxa míñgaki sha nakuatshak jiaga, abá naldakí, abetanuge. Guatshak mitsá juizha ekí sha nakuatoguéñ jiaga, aik zuxaitaldikuamak nauwiji Sáñkaldaki yo nakuí nagauneklde.✧  
<sup>12</sup> Akze namak, saldiñga Duwe Jesú ipanankue Jatek akldunamak izhokldana kakzekákueki sha kakualdixa. <sup>13</sup> Ekí ne sha atshixakue na, jian

✧ **3:11** 3.11 Sal 34.19; Ajsh 13.14-52; 14.1-20

shizhixakue ga ishkazguxakue na zúnake akldé akldénga sha ajanashiji alditshigapanaldixa. Ekueki naldagálde nuxa kágubakue jian agazukuatogatshak, jiak kauwizhéñ jiaga naldagálde nuxa jian kagazukuatoxaldixa nakldá.

<sup>14</sup> Ne ma zúnake namaklde shitiyamalde “namak shakldá” jañguamaldeki amak jañgualga maldoxaldí. Jinake naldakí. Mañki namaklde shi kizhixakuañ shi mixaldiyáñkalde mikué. <sup>15</sup> Ekíga na, nóngutse zhinik Jatetshi múldigaba sezheklde mikwasheklde nak. Akze, ai múldigabaki Jateja Asukuá Duwe Jesú zúnekualdal gaxane namak jañgui, alduna mishatshak mikualka ne migajieñguaka. <sup>16</sup> Guatshak Jatejañga ají múldigaba sezhekl-dauxaki, aldénga ai gauxakue kaksanegatshak za na amak ají múldigabaga kaltak kakaushanane. Akna, ai múldigaba sezhekl-dauxaki ekí zũñkazauñka: Jate shalda shi zũñkaldixa, shizhiyakualdiamak zũñkazauñka. Jatek akldunamak izhoxa shitiyakualdiamak, ijuldunatukakue izhgastuñshakualdiamak, jian izhogakue shaxaldiyakualdiamak zũñkazauñka nakldá. <sup>17</sup> Ekíki ezuak ezuak Jatetshi nekalde, aldéñ kaxazauñkakuañki saldiñga janshizhe nalda atshá guashi auxaga janazuñtune nal-dakualdiamak.

## 4

<sup>1</sup> Guatshak Duwe Jesú auxaga aksanexaldiamak mokue kagik nagatshak shua guanekue,

be izhogatukakue juizhi agatsaldi azhi agatsaldakí ne zunatualdixa nakna aldéñ, Saldiñga netshi Jate na natuatogéñ, ekí atshakue niuwi migexaldikue: <sup>2</sup> Jatetshi múldigaba guaxal za maldoxaldí. Mitsake kágubaja nukandana azhi nukasúñ kakzexaldiák jiaga, kakbeyal maldoxaldiamak janazhiktumalde maldoxaldí. Akna, ijuldunatukaki jian izhoxaldiamak aksanegakue. Sha atshatukaki izhgastuñshakue. Janshizhe izhoxa aldunaxa kakuiyakshakue. Ekí shi kabaxaldiyatshigak, axañga kagajienakí aldaldaldiák jiaga, egaba abeti, señgaba muldetua shi kaxaldiyalga maldoxaldí. <sup>3</sup> Akze, kágubakue namaklde shizhaldixa aldukasúñ kakzexaldixa ldiuwañ zexaldixa. Atshake sha atshindana kakzekája za kaksanegamak ajanashiji na, kauwizhéñ nukandana kakzeka za kagabeyaldiamak shizhixakue matshuwi ishka-juizhakualdixa. <sup>4</sup> Atshakna namaklde akldé nukasúñ kakzeshi, mauzeñga akuaka nane za aldukapanaldixa. <sup>5</sup> Ne ma zunake sakígaba zexaldiák jiaga, muldetua zhiksanekbalde za izhoshi na, jibañ tuabaldogatshak jiaga egaba abeti, Duwe Jesú zunekuane shalda aldukagáñga nukakuek kakbeji, Jateja axazauwakue majañguauxabé maxazauwaldí.

<sup>6</sup> Nas zunake Jatek akeshiñga naki shuixaldikuéñ au niuwi naxakldañkaldá na gu.\* <sup>7</sup> Guatshak naski Duwe Jesúja

---

\* **4:6** 4.6 Plp 2.17. Jatek jika agaxegatshak suxake ji agaxegatuka auxaga naldaldiamake ni iyasukuxa. Ekibeñga Pábuldu Jate axazauwiñga asuxake akeshi shuixaldixa guaklde.

axazauwaldikue nezhgakuxanamak nagatsauxa jiba atshijiñgaba, kama ilshiji izhonuge. Akze, abá naldakí ek agapa neji, alduna ishiji izhoshiña na, axatshaldikue nezhgakuxanamak saldikhá ni gukú. <sup>8</sup> Ekí Nauwijí Sáñkalda Duweja akldunamak, jian atshakuamak izhonuge shaldaki sáñkaldak izhalshuxa nageshi, matshuwi janshizhe naxatshaldixa au jananagaktú guane. Akze, aldéñki zñgatsahauxabé zñnatuñka nak, zñnatuál naxaldixa ldiuwañ amak nageshi janshizhe naxatshaldixa. Atshakna, nas za ekí nagegazhaldixa, ne saldiñgaja “Duwe mokue axaña nak guakuéñ” ajañgui jiaktuatonaldixakue jiaga, ekíga kagexaldixa nzha.

*Sakí axatshakue akbene*

<sup>9</sup> Mañki nauwa axaña jai nas nugéñ nakbil-daka niyakue ni majañgukú. <sup>10</sup> Jinake ekí mikbeyakí. Demaki✧ jai kagik zalda numakue za jañguapanguakna, nabashiñgueniki Tesaldónikaxa ne guane. Guatshak Duwek axazauwaldiamak Kaldesenteki Galdasía baxeni ne, Tituki✧ Dalmasia baxeni ne. <sup>11</sup> Alduka✧ za nagabane nagapa ni izhók. Akna maldagatshak, Malku✧ Jatek axazauwatokugéñ nagaunegaka nak izhgapa maldakuldaxaldí. <sup>12</sup> Guatshak Tíkikuki✧ Epesuxa gaxanuge. <sup>13</sup> Naxaldá makualdiake nají guañguakze, Kalpu tshuxa

✧ **4:10** 4.10 Kls 4.14; Plm 24 ✧ **4:10** 4.10 2Kt 8.23; Ga 2.3; Tit 1.4 ✧ **4:11** 4.11 Kls 4.14; Plm 24 ✧ **4:11** 4.11 Ajsh 12.12,25; 13.13; 15.37-39; Kls 4.10 ✧ **4:12** 4.12 Ajsh 20.4; Ep 6.21-22; Kls 4.7

Taduáxa<sup>☆</sup> mashanuge, nagakuxa maldakuldaxaldí. Nají kaltakue jiaga nakuldagakue, akldé giemiki kuizhukga aksezhekldekue nakuldak makualdí.

<sup>14</sup> Guatshak Aldejánduldu,<sup>☆</sup> shezhaxalda gauwi jibatshixaki, matshuwi sha nakuane. Ekí sha nakuane shaldaki Saldiña netshi Sáñkaldaja agishkualdikshi guiyaba tuñshaldixa.<sup>☆</sup> <sup>15</sup> Akze, ejañki Duwe zunekwane gakuaká aguldijiñgaba, zuñgitamakualdiamak izhone nakna, ma jiaga be maxaldoxaldí.

<sup>16</sup> Migatsaldi azhi migatsaldakí matuakuéñ kasak jai zalda sáñkaldakue naziyaxauldatshak, ni me jiaga nazikualdagábaki, nahezua nabashá akuane. Naldatshak ekí nakuane Jateja kagatuakue jañguakí nzhakú. <sup>17</sup> Ekí nabajatshak nauwiji Sáñkalda Duwe zúnake nas naña izhogatshak, aldéñ shalda muldetua guaxaldikuamak kama nagé. Ekíki saldiña juldiú saná naldagáldekue exa zhekuekueja aldukaldiamak. Atshak sha nakuí nakuaxaldixa ajañguane nalgué, Duweki nabi nakazháldiamak nazikualká janaña yo nakuá guane. <sup>18</sup> Akze, sakígaba sha nakuatshak jiaga, nauwiji Sáñkaldaki yo nakuí, numañ natuwiña, jékaldaxa aldéñ sanegeñka nauldeyaldixa. Aldéñ zaña na akldé akzamakga akzukual za kizhogataná nzha. Ekíga shi naldí.

### *Aldiwe akbene*

---

☆ **4:13** 4.13 Ajsh 20.6 ☆ **4:14** 4.14 1Tm 1.20 ☆ **4:14** 4.14 Sal 62.12; Alm 2.6



<sup>19</sup> Akilda, asewá Paldiska† nañga kajañguge makbeyaldí. Onésipuldu ajúk zaldakue juizhi ekíga makbeyaldí.✧

<sup>20</sup> Mikualdaldiamak Eldastuki kuíbuldu Kuld-intuxa abane. Taldopimoki mulbatá akzeguakna Mildetuxaga abá ni guñgú.✧ <sup>21</sup> Guatshak mañki níxalda bual zegagáñga maldaxaldiamak kama ilshiji makualdí. Ehúbuldu, Puldente, Aldinu, Kaldaudia saldiñga jai zalda Duwe ipananekueja jiaga majañguxa ni makuák.

<sup>22</sup> Nauwijí Sáñkalda Duweki mijí aldunaldi ma nañga shi izhoshí. Saldiñga netshi Jateki saldiñga minekuañ atemajañ éegaba guañ mi-majañgualga shi noshí. Ekíga shi naldí.

---

† **4:19** 4.19 Ai Paldiskaga na Paldásilda jiaga akuaka. ✧ **4:19** 4.19 Ajsh 18.2,18; 2Tm 1.16-17 ✧ **4:20** 4.20 Ajsh 19.22; 20.4; Alm 16.23

**Jatetshi múldigaba**  
**Kogi: Jatetshi múldigaba New Testament**

copyright © 2015 Wycliffe Bible Translators, Inc.

Language: (Kogi)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 13 Jul 2024 from source files  
dated 29 Jan 2022

7c5b6db6-c9a4-56c8-a822-4345cd7bafc0